

Banas

Sa tagal ng panahong hindi ko nagustuhan ang ulan,

Sa sandaling ito lamang

Hindi nagambala sa malakas na pagtagaktak nito sa kalupaan.

Bagkus ay tila inihehele ako ng bawat pagbugso.

Winawalis ang lahat ng bigat na aking nadarama

Habang naiinip sa simula ng labing-apat na araw na pagkukulong

Sa apat na sulok ng sariling tahanan na siyang nagsisilbing kanlungan.

Tila ugoy sa duyan ang tunog nang

Pagdaloy sa bawat linya ng bubongan.

Bumagal man o dagling bumilis ang mga patak,

Ako ay napapanatag.

Dahil sa gitna ng pagkatuyot ng aking isipan,

Sa bawat pangamba na idinudulot ng sakit na dumapo

Sa mga kapamilya ngayong pandemya,

Nalibang ako sa biglaang pagbuhos ng ulan

Sa 'di inaasahang araw.